

Regional News Unit AIR Aizawl

Friday, May 31, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Cyclone Remal a kiam a, Mizoramah furpui a intan thung a, ni 2 lo awm tur chhungin ruah a sur nasat rin a ni.**
- **Vawiin hian Aibawk leh Melthumah te leiminin a chhilh ruang te zawn chhunzawm a ni ang.**
- **Lok Sabha inthlan thawsarihna leh a tawp ber tur atana campaign theih hun chu nimin tlai khan a tawp.**
- **Paki Nepal-ah khawlum chak lutuk avangin zirna inte khar a ni.**

<><><>

MONSOON STARTS

Cyclone Remal a kiam a, Mizoramah furpui a intan thung a, ni 2 lo awm tur chhungin ruah a sur nasat rin a ni.

Aizawl Meterological Dept Director Sudheer Kumar Dwivedi-an a sawi danin, furpui a intan avang hian, ruah a sur nasat theih bakah, thli pawh a tleh ngei dawn a, hei vang hian mipuite an fimkhur chhoh a ngai dawn a ni.

Vawiin hian a sur nasa lehzual thei a, leimin thei lakah te leh chhum zing nasa avanga chetsual theihna lakah te inven fimkhur a tul a, Mahni in leh lo en fel a ngaih bakah current khaihlak avanga harsatna awm thei lakah te inralrin a tul dawn a ni, a ti.

<><><>

ELECTROCUTION

Cyclone Rema in Power line a tih chhialt siam tha a P&E Deptt Lungleia thawk lai, Pu Saihmingthanga Sailo kum 38 Lunglei Zohnuai chu power lian siam tha a 132 Kv Line ban a a lawn laiin ban atangin a tla a, damdawiin thlen hma in a thi.

Thudawna in a sawi danin power line siam tha a duty niin ban a a lawn dawn hian P&E Control room nen in bia in control room lam a duty te pawhin line Off a nih thu leh a him thu an hrilh angin banah hian a lawn ta a ni. Power line hi hrui thum niin ban ler atang hian Current hian a paihthla ta ni ngeiin a lang a, a thawhpui linemen ten Christian Hospital Serkawn an panpui nghal a, damdawiin thlen hma in a thi a ni.

Pu Saihmingthanga Sailo hian a nupui leh a fa naupang te te mipa 2 leh hmeichhia 1 a kalsan a, a fa upa ber hi pawl 8 zirlai niin a naute hi pawl 4 leh nursery zirlai an ni.

P&E Deptt Lunglei hotu te hnen atanga thudawn danin power hi off vek a ni a, Insulator pawh open vek a ni an ti a. Ban lawn tur hi staff an nei mumal tawh lova, a la service chhun te kum lam a upa tawh ban lawn chi ni tawh lo te niin pension leh thi te an awm in an hmunruak hnawhkhah a ni thin si lova, chuvangin thalai leh zuanzang zawk hlawhfa a an lak mai a ngai ta niin an sawi. Kan thudawn danin P&E Deptt Lunglei hnuaiah hian lineman te an duty laiin electric current man vanga thi hi kum 10 kalta chhungin 2/3 vel an lo awm tawh a, nunna chan chiah lo a, nataka current in a man te pawh tun kum 2/1 chhung hian an lo awm tawh a ni.



ZMC

Cyclone Remal thli tleh leh ruahsur avangin Falkawna Zoram Medical College (ZMC) chu ni 3 chhung vel dan pinin a awm a, nimin atang khan thawktu te pawh an inthlak leh thei tan chauh a ni.

ZMC leh a chhehvel hmun 30 chuang ah leimin in kawng a hnawh a, hospital bikah harsatna hrang hrang a thlen thu Zoram Medical College Director Dr. John Zohmingthanga chuan a sawi.

Ni 3 chhung hian ZMC campus leh a chhehvel ah power supply a chhiat bakah tui pipe tam tak leimin in a tichhiat avangin a damdawiin leh quarter zawng zawng kaltlang theih a ni lo va, Girls Hostel hnuai leivung ruahsur in a hawrh avangin zirlai 69 te chu hmun him zawkah sawn an ni.

Cyclone Remal vang hian hospital bikah harsatna power leh tui lamah te tawk mahse, damlo enkawl lai mek leh ICU awm mekte zingah nunna chan an awmlo a, tun dinhmun ah OPD kalpui theih a ni lova emergency erawh kalpui a ni a ti.



CYCLONE

Aibawk leh Tachhip inkar Salem Venga leimin in a chhilh Pu Matthew Lalchhanhima leh a nupui Pi Vanlalruali te ruang chu Rapid Response Team hovin vawiin hian zawn chhunzawm a ni ang.

Chhimpei khua zawng zawng deuh thaw in leimin avangin harsatna an tawh bakah khaw kar kawng leiminin a hnawh avangin ni 3 chhung tlawhpawh theih lohvin an awm tawh a, nimin khan mi 16 awmna Rapid Response Team hian Aizawl atanga motor kal theihna chin Muallungthu atangin ke in Aibawk hi an thleng a ni.

Aibawk khua in chhiat an tawh chungchangah hian tlawhpawh theih mai an nih loh avang leh inbiakbawhna phone network thlengin a that loh avangin an chanchin hriat a harsa thin a ni.

Aibawk khawtlang hruaitute sawi danin, an khaw thenawm ten pui ve mahse, helai phei khua zawng zawngin leimin avangin harsatna nasa takin an tawk a, heti chung hian chhanchhuah hna an thawhpui thei a, ruang zawn hna pawh chhunzawm zel an tum a ni.

Cyclone Remal si perin a ken tel ruahsur nasa vanga leiminin chenna in a hnawl vanga nunna chante zinga ruang pakhat chu nimin khan hmuh belh a ni a.

Ruang zawng hian mi tlawmngaite leh Central YMA-in hnatlang tura a ruat YMA Branch thahnem tak nimin khan an thawk chhuak a. Hlimen leiminin chenna in a hnawl vanga nunna chan ruang pakhat chu hmuh a ni a; heti hian Hlimen bika leiminin a hnawl ruang te chu hmuh kim a ni ta a. Hlimen leiminah hian Mizo pahnih leh hnam dang paliin nunna an chan a ni.

Hetih lai hian Aibawka ruang la hmuh loh pahnih leh Melthuma ruang pali-te chu ngawrh taka zawn zui zel a ni a, vawiin hian YMA kaihhruaiin ruang zawn chhonzawm a ni ang

Disaster Management & Rehabilitation (DM&R) Department chhin chhiah dan chuan tun hnaia ruahsur leh thli tleh vang khan Mizoram chhunga khaw 167-ah chhياتna a thleng a. Chhياتna hi Aizawl District-a hmun 59, Lunglei District-a hmun 30, Siaha District-ah hmun 9, Champhai District-ah hmun 12, Kolasib District-ah hmun 8, Serchhip District-ah hmun 11, Lawngtlai District-ah hmun 8, Mamit District-ah hmun 11, Saitual District-ah hmun 10, Khawzawl District-ah hmun 5 leh Hnahthial District-ah hmun 4-ah te a thleng a ni.



PHE – AIZAWL & SAITUAL WATER PUMP DISRUPTED

Aizawl khawpui chhung tui lakna ber Tlawng lui sawngbawlina khawl hrang hrang te tuilianin a tihchhiat chu engtik hunah nge siamthat a nih dawn hriat a la ni lo.

Public Health Engineering Dept. (PHED) Superintending Engineer (SE) Pu Lalrinzuala Ralte chuan Aizawl leh a chhehvel-a tui pump chhuahnaah harsatna nasa tak a thlen thu sawiin, ruahsur hian Tlawng tui lakna Pump House chima khawl engemawzat a tihchhiat avangin Aizawl khaw chhungah tui pump theih a ni rih lo tih a sawi.

Pu Lalrinzuala Ralte chuan tuilianin a tihchhiat nasat ber, Greater Aizawl Water Supple Scheme – Phase I chu tuilianin khawl a chim khah vek avangin tui pump chhuah theih a ni rih lova, Phase II power supply line pawh tuilianin a tihchhiat avangin tui pump chhuah theih a ni lo, a ti a. Tunah hian Phase II Generating set hmangin tui pump chhuah tum mek a nih thu sawiin, mamawh zual – hospital leh emergency a hman tur phuhruk thei tur chauh a nih avangin Aizawl khawchhungah ni 1-a tui pump theih zat 39 mld chu engtikah nge pump chhuah theih a nih dawn hriat theih a nih rih loh avangin mipuite chu tui ren tur leh ruahtui khawl turin a chah a ni.

Hetihlai hian Saitual leh a chheh vel chawmtu Tuivawl tui lian chuan Tuivawl PHE Pump house-a tui lak pennaah chirh dum tam tak a chhek avangin tui pump theih a ni rih lo a.

PHED-in Generator lian an dahna zawl chu Tuivawl lian hian a chim avangin power supply lamah harsatna a tirah chuan a thlen a, siam anih hnuah tui lak luhna hmunah chirh nasa taka a luh avangin tui hi pump theih a ni ta lova, nimirpiah khan a then fai hna zing kar atanga thawh ni mah se then fai zawh sen a ni lova. Chirh dum thian fai tur pawhin tui chim chin a la san avangin duh anga chet a la harsat thu PHED hotute chuan an sawi a, nimir khan chirhdum thenfai hna an thawk chhonzawm leh a ni.

Kum danga Tuivawl tui pump a harsat changa inngahna, tlangram tui lakna chu hmun thenkhatah leiminin a tihchhiat avangin tun dinhmunah rin theih a ni lova, thawktuten line chhia hi theihtawp chhuaha siamthat hna an thawh mek thu PHED hotute chuan an sawi.

PHED hotute chuan mipuite tui ren a, fur ruahtui a remchan anga dawh khawl hram hram tur leh chia lo turin an ngen a ni.



LADC

Lai Autonomous District Council (LADC)-a Chief Executive Member (CEM) Pu C. Lalmuanthanga'n Executive Member atana a ruat mi pakua, Governor-in tunkar Thawhtannia a pawmpuite chu nimin khan Lawngtlaia LADC Hall-ah Lawngtlai DC, Chemala Siva Gopal Reddy-a'n rinawmna thu tiamtirin LADC Executive Member atan a la lut a; lak luh hnu hian CEM hian Executive Member te hna chanpual tur tur a puang nghal.

Pu K. Lalthanzara Executive Secretary, LADC kaihhruai Executive Member te lakluhnaah hian Lawngtlai DC chuan MDC pakua - Lungtian bialtu Pu Sanghuliana Mualchin; Vathuampui bialtu Pu C. Rongura; Sekulh bialtu Pu Lallawmsanga Apetow; Bazar Veng Lawngtlai bialtu Pu Lalropuia Chinzah; Chawngte 'P' bialtu Pu Andrew Laltlanzara; Bualpui East bialtu Pu L. Daniala; Sangau South bialtu Pu JB Vanhoy; College Veng Lawngtlai bialtu Pu C. Hrangthianga leh Diltlang South bialtu Pu HC Lalthawmliana te rinawmna thu tiamtirin a la lut a ni.

CEM Pu C. Lalmuanthanga chuan zela hna an thawk thei tur chu lawmawm a tih thu sawiin, langtlang sorkar, mipui ban phak, thu nei fal bik awm lo, rualkhai taka ram tana hnathawh chu an tum ber a ni, a ti.

CEM hian amah leh Executive Member pakuate enkawl tur Department te a puang nghal a, nimin vek khan Executive Member te hian an room luah nghalin Pathian hnena lawmthu sawina leh inhlantarna an nei nghal a ni.



LOK SABHA

Lok Sabha inthlan thawhsarihna leh a tawp ber tur atana campaign theih hun chu nimin tlai khan a tawp a. Inthlan thawhsarihnaah hian Parliament Constituency 57 ah June ni 1 ah vote thlak tur a ni a. State leh Union Territory pasarihah inthlan a ni dawn a, Uttar Pradesh leh Punjab ah seat 13 ve ve, West Bengal ah seat 9, Bihar ah seat 8, Odisha ah seat 6, Himachal Pradesh ah 4, Jharkhand ah 3 leh Chandigarh ah pakhat a ni a. Inthlan thawhsarihnaah hian candidate 904 an awm dawn a ni.

Inthlan thawhsarihna rual hian Odisha-a Assembly bial 42 ah vote thlak a ni baw k ang.

Nimin Campaign tawp niah Political Party hruaituten campaign hmawrbaw nan theihtawp an chhuah a. Punjab ah chuan party hruaituten theihtawp chhuahin vote hui tumin tan an la a. Himachal Pradesh ah Union Minister leh Senior BJP leader Ntin gadkari chuan Karsog-a Mandi Parliamentary Constituency ah punkhkawm a huaihawt a. Uttar Pradesh Chief Minister Yogi Adityanath Kullu-a Dhalpur ah thu a sawi a.

Hei bakah hian BJP Candidate leh Union Minister Anurag Thakur nen Hamirpur Constituency ah an campaign bawk a. Hetihlai hian Congress hruaitu Priyanka Gandhi vadra pawhin Solan ah kawngzawh a huaihawt bawk a ni.

Jharkhand ah chuan intinah door-to-door campaign neiin BJP, JMM, Congress, RJD leh left party ten beihpui an thlak a. Jharkhand Chief Electoral Officer K Ravi Kumar chuan khawlum lutuk thlir chungin Polling Booth ah te ruahmanna an siam a ti a. Inthlanna zalen leh felfai tak a awm theih nan security forec thahnem tak venhim hna thawhtir an ni a ti bawk.



NEPAL

Nepal-ah khawlum chak lutuk avangin zirna inte khar a ni. Kathmandu Valley-ah chuan khawlum avangin mipui nunphung a khaihlak nasa hle a. Meteorological Forecasting Division chuan Kathmandu Valley ah hian celsius degree 33 te a kai dawn niin a hrilhlawk a. Hetihlai hian furpui hi kar khat hnuah a thlen beisei a ni a. Hemi hma hi chuan khua a lum hle tura ngaih a ni a.

